

Pinngortitaleriffiup Avatangiisinut, Aatsitassanut Ikummatissanullu Immikkoortoqarfittaavata 26. maj 2014-imi pisortatigoortumik atoqqaartinneqarnerani Avatangiisinut Pinngortitamullu Naalakkersuisup Kim Kielsenip oqalugiataa.

Asasakka qaaqqusat maanilu sulisut.

Pinngortitaleriffiup immikkoortortaqarfittaarnera pillugu pilluangaaritsi.

Nuannaarutigaa Avatangiisinut, Aatsitassanut Ikummatissanullu Immikkoortortaqarfittaap ullumikkut pisortatigoortumik ammaanersiorneqarnerani Naalakkersuisut sinnerlugit najuussinagaama.

Pinngortitaleriffiup ingerlatitaanerani naatsiassaq nutaarlusooq puttuppoq. Nunatsinni avatangiisinik illersuinerup tamatumalu atorneqarnera pillugu aqutsinerup tungaatigut ullumikkut alloriarujussuarpugut.

Tamanna avatangiisit tungaasigut siunnersuinerup ineriartortillugulu Nunatsinni aallaaveqartussatuut tunngavilittut pissusissamisoortumik ineriartortinneqarnerata ilagaa.

Aatsaat aallarnisarluarpugut, sulimi suliassat amerlaqaat. Tassami siulersuisut siulittaasuata Gert Mulvadip oqarneratut ilisimasarpasuit ukiut 40-t ingerlanerini katersorneqarsimasut imaaliillaannarlugit nuutsinneqarsinnaanngillat.

Taama ittumik immikkoortortaqarfeqalernissaa kissaatigiuarsimavarput, siunissatsinnut pingaaruteqartutigit nammineerluta oqartussaassuseqarnerujumagatta.

Taamaattumik tamatuma ukiormannamiit piviusunngorsinnaanera nuannaarutigaarput.

Immikkoortoqarfiup nutaap inerisarneqanera Nunatta DCE-llu ukiorpassuarni pitsaasumik suleqatigiissimanerisa taamaatikkiartuaarneqalerneratut isigineqassanngilaq. Attaveqaatinik kipisisoqassanngilaq, ineriartornermilli allanngornermillu pilersitsisoqassaaq, avatangiisitta pinngortitalu illersorneqarnissaannut pikkorinnerulernissarpullu siunertarigatsigu.

Taamaattumik DCE-p aatsitassat ikummatissallu tungaasigut ikiuttarnera pillugu Danmarkimi naalakkersuisunut isumaqatigiissutip ukioq manna kingusinnerusukkut nutarterneqarnissaa qilanaaraa.

Pinngortitaleriffik pilersinniarneqalermat Nunatta ilumut ilisimatusartartunik pikkorissunik ataavartumik atorfeqartitsisinnaanissaa qularutigineqarsimagaluarpoq. Inuit ikittunnguullutik Pinngortitaleriffik 1994-imi aallartippaat, mannaluk ullumikkut suliffeqarferujussuuvooq nunarpasuit akornanni akuerisaasooq 60-it sinnerlugit amerlassusilinnik aalajangersimasumik atorfilinnik sulisulik ilisimatuutullu misissuisartorpassuarnik ilinniartorpassuarnillu avataaneersunik suleqateqartartoq.

Isumaga malillugu avatangiisit atorneqarnerannik aqutsineq inuiaqatigiit ineriartornerannut peqatigitillugu ingerlanneqartussaavoq. Avatangiisillu pillugit siunnersuinerup pitsaalluinnartuullunilu, pituttorsimannitsuullunilu uppernartuunissaa Naalakkersuisut pingartippaat.

Soorunalimi pinngortitarsuaq atussavarput, aammali paarissavarput. Atorneqarnerata piujuartitsisumik tunngaveqarnissaa akisussaaffigilluinnarparput - pinngortitarsuarmi kingulissatsinniit attartugariinnagaarput.

Naggaatigut aningaalisuusut, *Villum Fonden* aamma *Oak Foundation*, Pinngortitaleriffiup immikkoortortaqarfittaavata pilersineqarneranut tapersiisuteqarsimanerannik qutsavigerujussuarpakka. Neriuppunga tapersiinersi nunatta siunissaanut inerititaqarfiulluarluni iluaqutaalluarumaartoq.

Qujanaq.